

四庫全書

史部

欽定四庫全書

史部

欽定續文獻通考卷三百二

三

給事中<sub>臣</sub>劉芬覆勘

總校官內閣中書<sub>臣</sub>孫溶

欽定四庫全書

欽定續文獻通考卷二百二

帝系考

皇太子 皇子

臣等謹按宋理宗無子以母弟榮王與芮之子為  
子即度宗也度宗子即恭帝端宗帝昺皆已詳帝  
號歷年今所纂斷自遼始

遼太祖四子

太宗居二餘三人長為文獻欽義皇帝倍三為章肅  
皇帝魯呼皆淳欽皇后生四為雅爾噶宮人蕭氏生  
倍小字托雲神冊元年立為皇太子後薨於太宗時  
謚曰文武元皇王其子世宗即位改謚讓國皇帝統  
和中更謚文獻興宗重熙中定謚文獻欽義皇帝廟  
號義宗其封為東丹王  
市詳封建考魯呼一名鴻觀太宗天顯五  
年立為皇太弟繼冊為壽昌皇太子世宗即位太后  
怒遣魯呼將兵往擊以耶律烏哲諫乃與世宗議和

後因太后復謀廢立徙祖州穆宗時其子喜隱反辭  
連及囚之死於囚所統和中追謚欽順皇帝重熙中  
更謚章肅皇帝雅爾噶天顯三年救耶律沙於定州  
為李嗣源所獲石晉立始還後薨

臣等謹按契丹國志曰自在太子名阮太祖第二  
子母曰舒嚕氏從征渤海平封為自在太子尋薨  
謚曰恭順皇帝一子伊喇趙王為景宗所害契丹  
國志世系圖太祖惟三子一太宗一東丹王一自

在太子與史言四子異自在太子不知何人恭順之謚與魯呼之謚欽順相似餘皆迥異不可得而深考矣

又按遼史皇子表自肅洽四子始至太祖已四世矣今斷自太祖之子始而以上諸祖之嗣續則列之皇族太祖以下各帝之孫曾行亦俱列之皇族以皇子門止應載一世也

太宗五子

長為穆宗餘四人二為齊王雅斯哈靖安皇后生保  
寧四年薨三為天德天祿二年以謀反誅四為莫王  
迪里乾亨初與宋師戰歿於陣五為越王必舒皆宮  
人蕭氏生

臣等謹按皇族表於太宗系止書莫王迪里一支  
意雅斯哈天德必舒皆無嗣也契丹國志世系圖  
太宗子為穆宗蒙古伊喇趙王三人蒙古不知何  
人伊喇志又言是自在太子子葉氏本書中亦多

外記

世宗三子

二為景宗餘二人長哈勒布早薨景宗立追冊為皇

太子謚莊聖三寧王扎穆妃甄氏生

皇子表曰舊史皇族傳哈勒布

列在第三未詳所出景宗行居二而舊史本傳云景宗親祭於墓追冊為太子當是世宗嫡長子也扎穆舊史書在第一景宗時封寧王保寧八年奪爵統和元年復爵今考聖宗紀曰統和元年奉遺詔召先帝庶兄質睦復封寧王質睦當即扎穆質景宗庶兄舊史未為大悞又景宗紀云於皇兄哈勒布墓則二人皆景宗兄哈勒布當是嫡長子但哈勒布之母並無明文可據今且依表書之而存其疑焉



臣等謹按契丹國志世系圖世宗六子長景宗餘  
為平王荆王吳王寧王河間王皆不書名惟寧王  
據史文當即扎穆餘不可考

景宗四子

長為聖宗餘三人次秦晉王隆慶薨後贈皇太弟三  
齊王隆佑皆睿智皇后生四樂師努未詳所出早卒  
臣等謹按景宗紀乾亨三年三月皇子罕巴卒罕  
巴表中無有豈卒在弱齡故不書抑即樂師努耶

又契丹國志世系圖景宗有子曰鄭格亦不知為何人

聖宗六子

長為興宗餘五人二秦王重元欽哀皇后生興宗立為皇太弟道宗冊為皇太叔清寧九年其子尼嚕古反軍潰重元自殺三柳城郡王布古德未詳所出四燕王武格五格爾皆布威氏生六混同郡王海古勒姜氏生

王圻續通考曰按聖宗紀開泰七年皇子宗真封  
梁王宗元永清軍節度宗簡右衛大將軍宗愿左  
驍衛大將軍宗偉右衛大將軍宗真即興名餘名  
與上不同又止五人蓋名乃後時改易而格爾暴  
疾薨故止五耳

臣等謹按契丹國志宗元即太叔重元又言其子  
曰洪孝同受誅洪孝其即尼嚕古乎又志中世系  
圖聖宗子晉王宗元齊王宗熙長沙王宗哲魯王

宗正幽王宗德宗教德爾吉與興宗共八人宗熙  
宗哲等名與史中宗簡宗愿又不同無從參考而  
合一之

興宗三子

長為道宗餘二人皆仁懿皇后生二宋魏王和羅噶  
乾統三年冊為皇太叔從獵於慶州薨三秦魏王阿  
林清寧時從秋獵薨

臣等謹按契丹國志燕王洪道本名濟魯海道宗

同母弟又世系圖載楚王洪孝晉王洪德皆道宗弟洪孝與重元子同名豈即其人與是道宗之同祖弟耳其名爵皆與史異

道宗一子

皇太子濬宣懿皇后生清寧九年封梁王咸雍元年冊為皇太子太康三年為耶律伊蘇所誣殺後謚曰昭懷太子其子天祚帝即位上謚曰大孝順聖皇帝廟號順宗

臣等謹按契丹國志作秦王元吉與正史異

天祚六子

長晉王額魯溫文妃生出繼大丞相耶律隆運後保  
大元年南軍都統耶律伊都與文妃密謀立之不果  
伊都降金文妃伏誅額魯溫不與謀得免耶律薩巴  
等復謀立之事覺縊死二梁王雅里元妃生元祚奔  
夏衆推稱帝三燕王塔魯早薨未詳所出四趙王錫  
訥母五秦王定六許王寧皆為金師所獲並未詳所

出

臣等謹按天祚紀有長子趙王母為趙昭容之語  
今表云趙王行居四而未詳所出與紀又異

金太祖子

景宣皇帝宗峻豐王烏里趙王宗傑聖穆皇后唐古  
氏生遼王宗幹光懿皇后費摩氏生宋王宗望陳王  
宗雋潘王額魯欽憲皇后赫舍哩氏生睿宗皇帝宗  
堯幽王鄂爾多宣獻皇后布薩氏生梁王宗弼衛王

宗強曹王宗敏元妃烏庫哩氏生紀王錫訥塔息王  
寧嘉莒王雅遜崇妃蕭氏生鄴王幹琿娘子特訥克  
生又有任王威赫亦崇妃蕭氏生

臣等謹按金史載太祖十六子止有鄴王幹琿以  
上十六人宗室表亦然王圻仍之考后妃傳崇妃  
蕭氏與其子任王威赫皆為海陵所殺海陵紀所  
書同則為太祖子無疑今特增入又豈即錫訥塔  
寧嘉雅遜三人中之一而有二名且封國亦有改



易與

宗峻本名勝額在諸子中最嫡天會二年薨其子熙宗即位追上尊謚曰景宣皇帝廟號徽宗海陵降之為豐王世宗復追尊之宗堯初名宗輔本名鄂爾多其子世宗即位追上尊謚曰立德顯仁啟聖廣運文武簡肅皇帝廟號睿宗宗萬本名額爾袞天眷二年以謀反誅宗傑本名穆里延天會五年薨宗強本名阿魯皇統二年薨宗敏本名阿里布海陵篡立時殺

之宗望本名幹喇布又作幹里雅布天會五年薨宗  
幹本名阿爾本太祖庶長子皇統時薨其子海陵篡  
立追謚憲古弘道文昭武烈章孝睿明皇帝大定二  
十二年削帝號追封皇伯太師遼王宗弼本名緄綽  
又作烏珠皇統八年薨餘不可悉考

太宗十四子

宋王宗磐本名富勒呼天眷二年以謀逆誅幽王宗

固本名呼嚕

宗固兄弟多因誣以謀  
逆誅詳後所引傳文

代王宗雅虞王

阿里布滕王呼沙呼薛王宗懿陳王宗本本名阿嚕  
翼王呼蘭天眷二年亦以逆誅豐王宗美本名呼爾  
察那王實圖美霍王哈必蘇蔡王沃哩畢王宗哲徐

王宗順

臣等謹按傳曰太宗十四子雷勒呼呼嚕呼拉布  
阿魯岱阿里布呼沙呼阿林阿嚕呼蘭呼爾察實  
圖美哈必蘇沃里和碩今取表中所列合之哈必  
蘇阿嚕岱阿林和碩當是代王宗雅薛王宗懿畢

王宗哲徐王宗順第不能分指其本名之所屬矣  
又諸王之所自出亦皆無可考

宗固宗本傳曰海陵在熙宗時見太宗諸子勢強  
而宗磐尤跋扈與呼蘭相繼皆以逆誅熙宗厚於  
宗室禮遇不衰海陵嘗私議之及篡立猜忌益深  
遂與秘書監蕭裕謀殺太宗諸子誣以反狀乃殺  
宗本宗美遣使殺東京留守宗懿北京留守卞繼  
又殺益都尹畢王宗哲平陽尹稟左宣徽使京

京宗

國子本名和色哩卡本名克實稟本名呼爾哈卡與稟皆太宗孫未詳何人之子而中京

留守宗雅喜事佛世稱善大王者亦竟殺之太宗

子孫死者七十餘人太宗後遂絕

太宗紀更有宗翰子孫三十餘

人諸宗室五十餘人皆同時死

### 熙宗二子

皇太子濟安悼平皇后生皇統二年三月立為皇太

子十二月薨謚英悼魏王道濟賢妃生皇統四年八

月熙宗殺之

熙宗子傳贊曰國初制度未立太宗熙宗皆自安班貝勒即位熙宗立皇太子始正名位定制度焉

海陵四子

皇太子光英圖克坦后生天德四年二月立為皇太子海陵伐宋光英居守汴京命圖們額里頁護衛之及海陵遇害額里頁遂殺之崇王元壽元妃大氏生天德三年薨宿王舒蘇鄂博柔妃唐古氏生正隆元年生三年薨滕王廣陽才人南氏生正隆二年生三年

年薨

臣等謹按光英之為皇太子事在天德四年而天德三年二月帝有謂侍臣昨日太子生日皇后獻朕田家稼穡圖朕甚賢之之語則光英未立以前當已稱太子矣

又按王圻續通考於海陵四子皆云母氏未詳今考傳中皆詳載之

世宗十子

衛紹王居七餘九人顯宗皇帝允恭趙王蘇尼越王  
薩魯昭德皇后生鍋王永中越王永功皆元妃張氏  
生鄭王永蹈潞王永德皆元妃李氏生豫王永成昭  
儀梁氏生夔王永升才人舒穆魯氏生

允恭後賜名永迪皇統六年生大定二年立為太子  
二十五年薨謚宣孝其子章宗即位追謚體道弘仁  
英文睿德光孝皇帝廟號顯宗

鄭王永蹈傳曰明昌三年永蹈因崔溫郭諫馬太



初私說讖記災祥言永蹈當得位乃陰結內侍伺  
帝起居其家奴上變詔鞠問賜永蹈及妃卞玉二  
子安春愛新公主長樂自盡後泰和七年以衛王  
永濟子阿禪為永蹈後

鎬王永中傳曰初置王傅府尉官名為官屬實檢  
制之永中自以世宗長子且老矣動有掣制情殊  
鬱鬱明昌四年鄭王永蹈以謀逆誅增置諸王司  
馬一員檢察門戶後鎬王傅尉以永中第四子鄂

蘭哈瑪爾語涉不道又第二子實圖美撰詞曲有不遜語家奴德格首永中與侍妾瑞雪言我得天下以爾為妃遣官覆按狀同詔賜永中死實圖美鄂蘭哈瑪爾等棄市貞祐二年徙永中妻子鄭州安置四年徙南京子孫禁錮自明昌至正大末幾四十年天興初弛禁未幾南京亦不守矣

章宗六子

絳王洪裕欽懷皇后生大定二十六年生二十八年

薨荆王洪靖資明夫人林氏生明昌三年生四年薨  
榮王洪熙明昌三年生未彌月薨英王洪衍明昌四  
年生未幾薨壽王洪輝永安二年五月生十月薨母  
氏皆未詳葛王德里元妃李氏生泰和二年八月生  
三年薨

衛紹王六子

皇太子從恪大安元年封胙王二年立為太子瑁瑄  
璵母氏皆未詳餘二人缺名至寧末呼沙呼殺衛王

從恪兄弟皆廢居中都又徙南京禁錮二十餘年哀宗開興時崔立為亂勒兵入見太后傳令立從恪為梁王後崔立送款於元至青城死焉

臣等謹按傳言大安元年封子六人為王胙王外有任王鞏王不知為何人所封號

宣宗四子

袁宗居三餘三人皇太子守忠母氏未詳貞祐元年立為太子三年薨謚莊獻立其子鏗為皇太孫始二

歲尋薨謚冲懷元齡早卒或曰莊獻太子母弟或曰麗妃史氏生荆王守純真妃龐氏生守純三子長肅國公額爾克次戴王某次鞏王特伯天興時額爾克出質後守純及諸宗室皆死青城

臣等謹按皇子門止應載帝之子一世餘當列之皇族今以守忠之子曾立為皇太孫則不宜與諸皇族並列守純之子或早卒或國亡竄死未成族分故附見於此

元太祖六子

三為太宗餘五人長卓沁太子早薨次二察罕台太子  
次四睿宗圖類次五烏拉齊次六科爾戩太子

圖類太宗同母弟太祖崩後監國者踰年太宗壬辰  
歲薨其子憲宗世祖相繼為帝憲宗初立追謚英武  
皇帝世祖至元十一年改謚景襄廟號睿宗

太宗七子

長為定宗餘六人次二庫騰太子次三庫春太子太

宗八年薨次四哈喇徹爾王次五哈斯大王次六哈坦大王次七默呼大王

弘簡錄曰至元二年分四親王南京屬州鄭州隸哈坦鈞州隸明埒州隸博囉齊蔡州隸海都蓋皆太宗子孫博囉齊乃庫春之孫海都乃哈斯之子而明埒應即默埒音相通也

宗室世系表曰按憲宗紀有云太宗以子裕隆不材故不立為嗣今考經世大典帝系篇及歲賜錄

並不見裕隆名故不敢列之世表

臣等謹按今元史憲宗紀無此文表中所引當是  
元代國史

定宗三子

長呼察大王次二諾果太子次三和和大王

憲宗五子

長巴爾圖大王次二烏蘇岱大王次三玉隆哈實大  
王次四河平王錫里濟次五璜都



世祖十子

長多爾濟王次二裕宗皇帝珍噶次三安西王莽噶  
拉至元十七年薨次四北安王諾木罕大德五年薨  
次五雲南王和克齊至元八年薨次六阿雅噶濟大  
王次七西平王鄂囉齊次八寧王庫庫楚皇慶二年  
薨次九鎮南王托歡大德五年薨次十和搭拉特穆

爾王

按世祖諾爾布皇后傳云有子一人名特默齊表中不載不可詳考

珍噶世祖嫡子至元十年立為皇太子後世祖春秋

高南臺御史請內禪帝震怒太子憂懼得疾薨帝追  
悔謚明孝太子其次三子成宗即位追謚文惠明孝  
皇帝廟號裕宗長子噶瑪拉至元中出鎮北邊封梁  
王進晉王大德六年薨泰定帝即位追尊光聖孝仁  
皇帝廟號顯宗文宗時毀其廟室次子達爾瑪巴拉  
至元二十九年薨武宗即位追謚昭聖衍孝皇帝廟  
號順宗

臣等謹按皇子門例止載一代今顯宗順宗不宜

載入皇族故附載於此

成宗一子

德壽大德九年立為皇太子未幾薨

武宗子

已詳帝號歷年門

仁宗二子

長為英宗餘一人安王溫都遜布哈英宗即位後被

殺

泰定四子

長阿爾濟雅巴泰定元年立為皇太子泰定帝崩丞相都爾蘇立以為帝齊王伊嚕特穆爾舉兵圍上都都爾蘇奉之出降後不知所終次二晉王巴特瑪雅爾藏布次三蘇蘇太子次四允丹藏布太子俱早薨

明宗二子

已詳帝號歷年門

文宗三子

長喇特納達哈至順元年封燕王尋立為皇太子次  
年薨次二雅克特古斯初名古嚕達喇順帝至元六  
年被放高麗為從臣伊徹察喇所弑次三太平訥太  
子早薨

順帝三子

長阿裕實哩達喇至元十三年立為太子後從帝奔  
應昌不知所終餘二子早世名無考

臣等謹按弘簡錄附載明洪武三年元主之子蘇都爾降於明不知即順帝子否也

明太祖二十六子

成祖居四餘二十五人太子標奏王棧晉王桐周王  
橐皆高皇后生楚王楨胡充妃生齊王搏潭王梓達  
定妃生魯王檀郭寧妃生蜀王椿代王桂谷王穗郭  
惠妃生湘王柏胡順妃生遼王植韓妃生慶王璉余  
妃生寧王權楊妃生岷王楸韓王松周妃生潘王模

趙貴妃生唐王桎李賢妃生郢王棟劉惠妃生伊王  
模葛麗妃生肅王模母郜無名號趙王妃安王極皇  
子楠皆未詳所生母

長子標太祖為吳王立為世子洪武元年立為皇太  
子二十二年薨謚曰懿文太子其子惠帝即位追尊  
為孝康皇帝廟號興宗成宗即位復降稱太子

臣等謹按史料止稱二十四子豈以趙王妃生三  
歲而殤皇子楠踰月而殤故畧之與王圻續通考

引天潢玉牒亦有稱二十四子者然王圻仍以二十六子為實又王圻封建考內所載諸王之母間有不同如以魯王為郭貴妃生岷王為湘王同母亦胡順妃生又代王之母鄭曉云徐妃武寧王女或曰下邳人考代王傳王妃乃武寧王徐達女也王圻之言誤矣

惠帝二子

文奎建文元年立為皇太子燕師八年七歲矣莫知



所終文圭年二歲成祖入幽之中都廣安宮號為建  
庶人英宗復辟始釋出之未幾卒

臣等謹按文圭之出在天順復辟時聽居鳳陽婚  
娶出入自便年已五十七歲矣未幾卒史不言其  
有子史料有錄建庶人後人數之語豈文圭或有  
子抑興宗子允燭允燧允熙之後裔與史傳中無  
可詳考王圻封建考亦云文圭卒建文嗣絕又附  
載傳信錄言成祖入宮時建文有幼子老嫗教之

牽成祖衣哭跪而求食成祖育諸宮中此所載當不足信

成祖四子

長為仁宗餘三人漢王高煦趙王高燧俱文皇后生  
高熾未詳所生母

仁宗十子

長為宣宗餘九人越王瞻墉襄王瞻埈昭皇后生鄭  
王瞻峻蘄王瞻垠淮王瞻埈李賢妃生荆王瞻垿張

順妃生滕王瞻塏梁王瞻垧衛王瞻埏郭貴妃生

臣等謹按王圻封建考既以高煦為成祖次子高燧為成祖三子又以仁宗子瞻峻瞻墉瞻塏瞻埏

瞻塏瞻埏即滕王名與史異瞻垧瞻埏八人皆以為成祖

子而云永樂二十二年十月封子八人為王獨不思成祖崩於是年之七月至十月仁宗已即位故封其子為王乎王圻之舛誤甚矣

宣宗子

已詳帝號歷年門

英宗九子

長為憲宗餘八人崇王見澤周皇后生德王見潯皇  
子見湜吉王見浚忻王見治萬宸妃生許王見淳王  
惠妃生秀王見澍高淑妃生徽王見沛韋德妃生

臣等謹按明史云英宗九子孫承澤春明夢餘錄  
云英宗十子於史傳所載九人外多榮王一人考  
鄭汝璧皇明世系亦無榮王明史德王傳曰見潯

於景泰三年封榮王天順元年封為德王則榮王  
即德王也春明夢餘錄列為二人誤矣至史料僅  
書英宗七子今考其所不載者見湜見澤也見湜  
固早卒而見澤於成化十年就藩汝寧弘治十八  
年始薨其子襲爵史料亦缺之是不可解

景泰帝一子

見濟杭妃生始為郕王世子景泰三年立為太子是  
年薨謚曰懷獻天順元年仍降稱世子

憲宗十四子

孝宗居三餘十三人皇第一子萬貴妃生悼恭太子  
祐極柏賢妃生興獻帝祐杭岐王祐棬雍王祐樞邵  
后生益王祐楨衡王祐棬汝王祐棖張德妃生壽王  
祐楷姚安妃生涇王祐楦申王祐楷楊恭妃生榮王  
祐樞潘端妃生皇第十子王敬妃生第一子第十子  
皆未名殤

臣等謹按春明夢餘錄作憲宗十三子缺第一子

而以皇十子為皇八子與史異考錄中載崇禎時  
諭德許士柔上言帝系疏內亦有憲宗純皇帝十  
有三子之語史料雖云十四子而所列仍止十三  
人無第十子疑十三子為得其實耳

祐杭第四子也成化二十三年封興王正德十四年  
薨謚曰獻王薨二年而世子入嗣大統是為世宗初  
追尊為興獻帝嘉靖三年加稱為本生皇考孝穆獻  
皇帝尋去本生字七年明倫大典成加上尊謚曰恭

睿淵仁寬穆純聖獻皇帝十七年通州同知豐坊請  
加尊廟號稱宗以配上帝九月加上尊號知天守道  
洪德淵仁寬穆純聖恭獻敬文孝皇帝廟號睿宗

孝宗二子

長為武宗餘一人蔚王厚燁

世宗八子

穆宗居三餘七人哀冲太子載基閩貴妃生莊敬太  
子載壑王貴妃生景王載圳盧靖妃生穎王載璽江



肅妃生戚王載墜趙懿妃生薊王載墮陳雍妃生均  
王載胤趙榮妃生

穆宗四子

神宗居三餘三人憲懷太子翊武孝懿李后生潞王  
翊鏐孝定李后生靖王翊鈐母氏無考

神宗八子

長為光宗餘七人福王常洵沅王常治鄭貴妃生瑞  
王常浩周端妃生惠王常潤桂王常瀛李貴妃生邠

王常淑永思王常溥母氏無考

光宗七子

長為熹宗五為莊烈帝餘五人簡王由櫟王皇后生  
齊王由楫王選侍生懷王由模李選侍生湘王由栩  
定懿妃生惠王由禧敬妃生

熹宗三子

懷冲太子慈然母氏未詳悼懷太子慈熿范貴妃生  
獻懷太子慈炁任容妃生

愍帝七子

太子慈娘懷隱王慈烜定王慈烟周皇后生永王慈  
焰悼靈王慈煥悼懷王及皇七子皆田貴妃生

傳曰慈娘將選婚以寇警暫停京師陷賊獲太子  
偽封宋王後不知所終及由崧在南京時有自北  
來稱太子者驗之以為駙馬都尉王昺孫王之明  
者偽為之繫獄中袁繼咸劉良佐黃德功皆上疏  
爭而左良玉兵起以救太子為名真偽莫能知也

後降於我

大清定王永王亂後不知所終慈烜慈煥皆早薨悼懷  
王及皇七子皆早殤名俱無考

臣等謹按春明夢餘錄云穆宗二子神宗潞王神  
宗五子光宗福王惠王桂王瑞王崇禎帝三子皇  
太子永王定王以史傳証之其缺畧多矣

欽定續文獻通考卷二百二

欽定四庫全書

欽定續文獻通考卷二百三

帝系考

公主

宋理宗一女

周漢國公主賈貴妃生景定二年下嫁楊太后之姪  
孫節度使鎮四年薨諡端孝

臣等謹按通考已載至寧宗女祁國公主今所採

止理宗一女而已

遼太祖一女

濟古爾下嫁淳欽皇后弟蕭舒嚕幼為奧姑未封而

卒

遼國史語解曰凡納后即族中選尊者一人當奧而坐以主其禮謂之奧姑送后者拜而致敬

太宗女

羅卜科下嫁北府宰相蕭思溫應歷間封汧國長公

主保寧中進封燕國大長公主綽哈下嫁北府宰相  
蕭哈里未封卒

臣等謹按表云太宗二女考蕭哈里傳曰天祿間  
娶明王安圖女阿雅翁主應厯初察克亂阿雅連  
坐繼娶綽哈翁主本漢書諸侯女之稱故不曰尚  
而曰娶則綽哈當亦非太宗女也今且依表列之  
而據傳以志其誤

世宗三女

皆懷節皇后生長和克丹下嫁侍中蕭卓琳保寧間  
封秦國長公主次觀音下嫁蕭實喇保寧間封晉國  
長公主三薩喇下嫁蕭翰里未封卒

臣等謹按聖宗紀統和元年正月公主和克丹進  
助山陵費四月幸公主和克丹第又懷節皇后傳  
察克作亂時后生蒙古公主方在蓐蒙古公主餘  
無可考

景宗四女



睿聖皇后生三女長觀音女下嫁北府宰相蕭繼先  
初封魏國公主進封齊國景福中封燕國大長公主  
次長壽女下嫁宰相蕭巴雅爾封吳國公主統和初  
進衛國改魏國長公主三延壽女下嫁蕭恒德封越  
國公主薨後追封趙國四淑格渤海妃生下嫁盧俊  
不諧改適蕭實訥無封號

王圻曰按聖宗統和元年二月以皇女長壽公主  
下嫁國舅布希子烏里十月以公主淑格下嫁國

舅詳袞珠克七年四月國舅太師蕭達蘭為子巴雅爾請上皇女延壽公主許之今考之公主表所適之人不同豈名異而人則一乎此不可曉矣

聖宗十四女

長雅克貴妃生

貴妃不言何氏

下嫁蕭必魯封隨國公主進

秦國興宗時封宋國長公主二伊木沁欽哀皇后生

下嫁蕭綽班改適蕭哈里不諧改適蕭呼敦又不諧

乃適韓國王蕭惠開泰七年封魏國公主後進秦國

長公主改封秦晉國清寧初加大長公主三碩格欽

哀皇后生下嫁蕭孝忠封越國公主進晉國景福初

封晉蜀國長公主清寧初加大長公主四吹巴勒蕭

氏生下嫁蕭孝先封南陽郡主進封公主太平末東

京大延琳反遇害五陶格蕭氏生與吹巴勒同母下嫁蕭揚

魯封長寧郡主進封公主六塔納蕭氏生與吹巴勒同母下

嫁蕭雙寬封平原郡主進封荆國公主七玖格馬氏

生下嫁蕭璉封潯陽郡主進封公主八長壽大氏生

下嫁大力秋大力秋坐大延琳事伏誅改適蕭繅固  
封臨海郡主進封公主九巴格白氏生下嫁劉三嘏  
封同昌縣主進封公主十實格白氏生下嫁奚王蕭  
果濟封三河郡主進封公主十一石紳白氏生下嫁  
劉四端封仁壽縣主進封公主十二秦格白氏生下  
嫁蕭呼哩十三賽格李氏生下嫁蕭托雲封金鄉郡  
主進封公主按蕭托雲傳主本封金鄉公主  
以殺家婢降封郡主與表異十四興  
格艾氏生下嫁蕭旺祿

興宗二女

皆仁懿皇后生長巴戩下嫁蕭薩巴不諧改適蕭阿  
蘇以婦道不脩徙中京又嫁蕭沃聶封魏國公主重  
熙末徙封晉國加長公主次烏拉台下嫁蕭額哩頁  
封鄭國公主清寧間加長公主壽隆間加大長公主  
道宗三女

皆宣懿皇后生長色克只下嫁蕭末封鄭國公主咸  
雍中徙封魏國二嘉哩下嫁蕭托卜嘉封齊國公主

進趙國三托里下嫁蕭綽哈綽哈得罪離之改適蕭  
特默初封越國公主乾統初進封秦晉大長公主又  
徙封梁宋國從天祚出奔後為金人所獲

公主表曰托卜嘉坐昭懷太子事被害其弟額都  
溫欲逼尚嘉哩公主公主以其黨伊蘇惡之未幾  
額都溫伏誅天祚初伊蘇用事公主每以匡救為  
心竟誅伊蘇

昭懷太子一女

延壽下嫁蕭罕嘉努封楚國公主徙許國乾統初進  
趙國加秦晉國長公主

天祚六女

一為額哩音文妃生封蜀國公主元妃

即后也

生三女

宮人生二女俱闕名凡六人俱為金人所獲

臣等謹按金史宗望傳曰太祖嘉宗望功以遼蜀

國公主額哩音賜之又言望宗破遼時遼主女古  
裕額哩音烏里頁大敖拉次敖拉皆降則天祚六

女止缺一人名耳第額哩音外俱不能分考其行  
次及所生母矣

又按遼代王姬皆下嫁蕭氏之族列傳與表互有  
詳畧如逆臣蕭翰傳天祿二年尚帝妹額伯哩公

主疑為義宗女蕭呼敦傳與秦國長公主不諧復尚齊

國公主蕭托果傳應歷初始入侍詔尚樸謹公主  
又蕭奉先傳有駙馬蕭昱之名烈女耶律努妻蕭  
氏傳有其母呼都克公主之語求之表中俱不可



考又據蕭必塔傳尚秦晉王公主蕭阿拉傳重熙  
末尚秦晉國公主而蕭托雲之孫額都溫尚三韓  
郡王赫嚕女古裕公主則知遼代凡諸王之女亦  
得稱公主也

附錄下嫁屬國主

聖宗統和七年以王子帳耶律襄之女封義成公主下

嫁夏國王李繼遷

王本作五年又作李繼遷為子  
求婚與史異不知何據今從史

興宗

景福元年以興平公主下嫁夏國王李德昭子元昊後

不諧公主薨遣使持詔問之天祚帝乾統二年以族女南仙封成安公主下嫁夏國王李乾順

聖宗統和十四年高麗王治乞為婚姻以駙馬蕭恒德女下嫁之

王圻曰恒德女不封公主史失之耳

聖宗太平元年大食國王遣使為其子策格請婚以王子班郎君和索哩女噶老封公主降之

臣等謹按以上諸公主王圻仿通考漢代下嫁單

于之例題曰和番公主且云西夏高麗雖遼屬國而叛服不常終非所樂與婚也故總謂之和番今按漢時婁敬之策蓋以中國之力不足制外夷故借舅甥之情以息干戈之擾遼時西夏高麗豈能與遼抗衡况大食國之更小者乎故仍玉本載之而削去和番之名且論其時勢之不同如此

金太祖女

長名烏嚕下嫁圖克坦定格定格死其弟恭

本名強

尚之海陵時恭妾呼達譖烏嚕於海陵后被殺一下  
嫁實嘉努實嘉努自幼養於太祖及長以女妻之一  
號畢國公主下嫁烏爾古額琳一為梁國大長公主  
餘未詳

臣等謹按烏庫哩元忠傳曰世宗大定十五年元  
忠為大興府有僧犯法皇姑梁國大長公主為請  
元忠不聽世宗為太祖孫則皇姑當為太祖女矣  
世宗本紀大定十八年御史中丞劉仲晦侍御史

李瑜坐失糾察大長公主削官一階大長公主不言何國王圻續通考云睿宗妹梁國公主下嫁布薩揆考揆本傳世宗大定十五年尚韓國大長公主非梁國也

世戚傳曰圖克坦納喇唐古富察費摩赫舍哩布薩皆貴族也天子娶后必於是公主下嫁必於是

太宗女

臣等謹按王圻續通考曰太宗女鄂國公主下嫁

多科阿林今考圖克坦繹傳曰繹祖薩噶爾瑪克  
國初有功授隆安府路合扎穆昆多科阿林明安  
又曰繹母鄂國公主又曰繹家世貴寵自曾祖照  
至繹尚公主者四世所言止此而已繹父名某鄂  
國公主為何帝女並未詳王圻以多科阿林為人  
名而即以為繹之父又以鄂國主為太宗女皆不  
知其何所據

熙宗姊妹

景宣  
帝女

景宣皇帝女下嫁圖克坦賽音

臣等謹按思恭傳父賽音尚熙宗妹當是景宣女也

熙宗女

一為代國公主下嫁唐古辯一為鄭國公主下嫁富

察鼎壽一為冀國公主

章宗欽懷皇后傳后為鄭國公主就食於姨冀國公主

一為第七女潘國公主下嫁圖克坦繹一下嫁圖克

坦富均努

臣等謹按富察鼎壽傳其長子希卜蘇凡三尚定國景國道國公主皆不知為何帝女王圻本作世宗女不知何據又昨王元傳有皇統七年富察額古德子尚主事不知所尚何主

海陵姊妹

遼王女

遼王宗幹女遼國長公主都本下嫁富察阿固岱主

薨繼尚鄧國長公主崔格

二公主內當有一人即慶宜公主

一為嘉

祥縣主下嫁圖克坦克寧

縣主疑是後時降號

一為平陽長公



主海陵同母女弟也下嫁圖克坦貞

按世宗時降永平縣主后妃傳

稱梁國公主乃章宗時追封之號

臣等謹按富察阿固岱傳不言其子為某富察鼎

壽傳云鼎壽為海陵女弟慶宜公主子亦不言其

父為某考后妃傳海陵之嬖徹辰為富察阿固岱

女海陵姊

與女弟又不符

慶宜公主所生海陵本紀所載

同則鼎壽與徹辰同母當即阿固岱之子也第阿

固岱傳以遼國公主為海陵姊鄧國公主不言為

姊為妹鼎壽傳以慶宜公主為海陵女弟后妃傳  
又以為海陵姊故不能定慶宜之為遼國為鄧國  
耳王圻續通考以遼國鄧國慶宜為三人則誤矣

### 海陵女

一下嫁烏庫哩誼

誼本名雄名宣宗紀以駙馬  
雄名第賜呼沙呼即誼第也

一為

榮國公主下嫁珠蘇爾一下嫁蕭玉子

圖克坦額呼楚克傳曰海陵將弒熙宗欲得額呼  
楚克為內應遂許以女娶其子海陵既立以榮國

公主下嫁其子珠蘇爾又蕭玉傳曰海陵謂玉曰  
朕始得天下常患太宗諸子方強賴社稷之靈卿  
發其奸朕無以報使朕女為卿男婦

世宗姊妹

睿宗女楚國長公主下嫁唐古德溫冀國長公主下  
嫁烏庫哩尼瑪哈

世宗女

長為魯國大長公主下嫁烏庫哩元忠

按張景仁傳  
言元忠尚豫

國公主當是公主初  
封豫國後進魯國

一為第二女唐國公主下嫁圖

克坦思恭一為息國公主下嫁圖克坦公弼一為第

四女吳國公主下嫁唐古貢一為第五女蜀國公主

下嫁唐古鼎一為第七女宛國公主下嫁烏凌阿復

一為韓國大長公主鄭王永蹈同母妹下嫁布薩揆

一為澤國公主長樂與鄭王謀叛賜自盡一為第十

四女下嫁赫舍哩志寧子諸神努一為衛國公主下

嫁富察通子富色里

臣等謹按諸神努所尚者為第十四女則世宗之女固  
有十餘人也今所搜輯不能得其全矣

章宗姊妹

顯宗女鄴國公主下嫁烏庫哩誼誼初尚海陵女海

陵女卒又尚鄴國公主

烏庫哩誼傳鄴國又云薛國

臣等謹按烏庫哩元忠傳其子誼尚顯宗長女薛

國公主事在大定十八年之前及誼傳又云大定二十一年尚顯宗女廣平郡主章宗時進鄴國長

公主合而觀之似薛國鄰國為二人皆誼先後所尚也然誼傳云大定八年尚海陵女海陵女卒大定二十一年尚廣平郡主則中間又無更尚一主之事父子二人之傳互異若此不可解矣

衛紹王女

岐國公主歸於元

臣等謹按宣宗本紀曰貞祐二年奉衛紹王公主歸於元餘未詳考元史太祖九年金主求和奉衛

紹王女岐國公主以獻則其國名可徵矣

宣宗女

溫國公主

宣宗紀曰帝初即位封皇女溫國公主

餘未詳

臣等謹按以上所載諸帝公主皆史有明文者也  
外此尚有數人史不言何帝女王圻以其時事考  
之而斷以為某帝女者蓋以漢唐宋定制帝女為  
公主帝之女兄弟為長公主帝之諸姑為大長公

主金史當亦循此稱謂故耳第恐遼金諸史未必體例畫一若此故統列於後而節錄紀傳之文以示傳疑云

曹國公主

臣等謹按世宗紀大定十二年有曹國公主家奴犯事之事不言何帝女疑卽世宗女

邢國公主下嫁布薩安貞

臣等謹按布薩揆與其子安貞傳皆言尚邢國公



主而不言何帝女其尚主在章宗時王圻本屬之  
顯宗女者以長公主之名定之耳

部國公主下嫁烏凌阿琳

臣等謹按本傳不言何帝女王圻以為章宗女

昇國公主

臣等謹按章宗紀曰泰和二年四月幸昇國長公  
主第問疾王圻以為顯宗女

沂國公主

臣等謹按宣宗本紀曰興定三年閏三月以沂國公主薨輟朝疑即宣宗女

又按赫舍哩志寧傳尚梁王宗弼女永安縣主烏庫哩布察呼傳尚宋王宗望女昭寧公主實庫則知金代諸王之女固亦有稱公主者矣

又按金史公主世戚皆無表世戚有傳亦不詳備凡某帝之有幾女以及輩行之尊卑長幼之次序生卒之年月徃徃缺畧考熙宗天眷二年八月定

公主郡縣主及駙馬官品其制度亦弗可考當海陵弒熙宗後宗室且斬艾殆盡其於公主可知矣今據王圻續通考而遍考正史紀傳以補其缺焉又按百官志諸王諸公主所封國號皆掌於吏部又有封公主之縣號三十樂安清平蓬萊榮安棲霞壽光靈仙壽陽鍾秀惠和永寧聞喜秀容宜芳真寧嘉祥金鄉華原

志中所列未符三十之數

今考之諸公主

封號皆不見

元太祖女

昌國大長公主浩沁必濟下嫁昌王巴圖巴圖初尚  
太祖妹昌國大長公主特穆爾特穆爾卒以浩沁必  
濟為繼室趙國大長公主阿拉克必濟下嫁趙王布  
頁赫高昌公主伊埒哈屯下嫁伊都呼巴哩珠阿勒  
坦德濟伊都呼者高昌國主之號也

太宗女

蘇呼肯公主下嫁蕭寧忠武王阿禪之孫納罕

定宗女

趙國大長公主伊呀默色下嫁布貝赫長子趙王準  
布哈巴克巴噶爾公主下嫁巴哩珠阿勒坦德濟曾  
孫伊都呼和爾齊哈喇德濟

憲宗女

昌國大長公主巴雅爾罕

和琳傳作巴雅爾  
罕表作巴雅爾

下嫁昌

王扎古喇沁次子和琳

表止作適扎古喇  
沁子今從弘簡錄

臣等謹按弘簡錄採劉國傑傳而云其子托歡尚

憲宗女未詳何名今考劉傳托歡乃尚憲宗孫女也邵氏之言誤矣

世祖姊妹

睿宗女

魯國大長公主伊蘇布哈下嫁濟寧忠武王阿禪子  
旺沁塔瑪噶公主下嫁北平王鎮國子尼古爾台布  
頁赫之從姪也

世祖女

烏爾駝公主下嫁和琳從弟布哈

公主表作特濟根子布哈與和琳傳

異魯國大長公主囊嘉特章下嫁納沁子額埒春後  
又適特穆爾弟曼濟台趙國大長公主伊埒下嫁布  
頁赫次子趙王阿爾布哈呼圖克濟延額實公主下  
嫁高麗王王懋懋後改名暎成宗即位封皇姑安平  
公主

臣等謹按托音色辰傳曰阿禪之地納沁襲萬戶  
從世祖征伐皆以其子額埒春等十人自從額埒  
春尚鄂勒哲公主未詳何帝女似世祖女鄂勒哲  
而無明文故不載入

公主薨繼尚叢嘉特章公主額埒春卒無子其弟  
曰特穆爾襲萬戶特穆爾卒其子二人皆幼乃以  
其弟曼濟台襲萬戶亦尚叢嘉特章公主至成宗  
即位封皇姑魯國大長公主今公主表中乃作初  
適納沁子特穆爾誤矣又表於睿宗女塔瑪噶公  
主作適巴哈弟郇王尼古爾岱此趙國伊埒公主  
作適巴哈子趙王阿爾布哈巴哈當即布頁赫也  
傳載布頁赫與鎮國為從兄弟尼古爾台係鎮國



之子為布頁赫之從姪與阿爾布哈為再從兄弟  
今表一曰巴哈弟一曰巴哈子亦誤

成宗姊妹

裕宗女

趙國大長公主呼圖克坦額實下嫁趙王阿爾布哈  
子奇爾濟蘇蒙古台公主下嫁岐王拜特穆爾成宗  
大德十年封鄆國大長公主仁宗延祐四年加封皇  
姑大長公主魯國大長公主納木喀巴拉下嫁曼濟

台為繼室

臣等謹按表以奇爾濟蘇為準布哈子誤蒙古台公主表云鄆國大長公主蒙古台適阿爾布格子寧濮郡王昌吉大長公主僧格巴拉適阿爾布格子岐王托克托穆爾紀表互異若此未知孰是

成宗女

昌國大長公主伊勒噶雅下嫁和琳子昌王阿實克  
趙國大長公主阿哩雅實哩下嫁奇爾濟蘇為繼室

武宗仁宗姊妹

順宗女

魯國大長公主僧格喇實下嫁阿勒達爾即額埒春之弟特穆

爾賜名阿勒達爾

之長子魯王多阿克巴拉武宗初封皇妹

大長公主仁宗皇慶間封皇姊大長公主天歷間加

號皇姑徽文懿福真壽大長公主

臣等謹按多阿克巴拉阿勒達爾子也額埒春無

子故其弟阿勒達爾襲萬戶弘簡錄以多阿克巴

拉作額埒春長子誤

仁宗女

庫庫楞公主下嫁托音色辰孫托羅海為繼室

泰定帝姊妹

顯宗女

薊國大長公主布達實哩下嫁潘王

即高麗王

王諫

即璋也

臣等謹按泰定三年以帝師兄索諾木藏布尚公主錫王爵未知所尚何主不可考

明宗女

布達錫勒公主順帝至正元年加封皇姊明惠貞懿

大長公主

弘簡錄曰順帝紀至元元年封裕羅勒公主為皇  
姊昌國大長公主則疑其為明宗之女也

臣等謹按以上諸公主皆合紀傳與表而可考其  
為何帝之女者也外此表傳所載有可考其為諸  
皇子之女者并有不可考其為何人女者仍循表  
中諸公主封位合叙於左

昌國大長公主伊奇喇斯下嫁巴圖子特濟根繼  
室以察喇亦封昌國大長公主

皆不知何帝女公  
主表有巴圖諸人

傳及弘簡  
錄皆無

又昌國大長公主安圖太宗子庫春女

下嫁巴圖子纒勒噶

表有纒勒噶  
傳有庫春

又有伊孫展公

主親王阿齊台之女太宗命妻纒勒噶子扎古喇

沁

傳表  
皆有

又有王子賽音珠卜女

弘簡錄云皇子內  
無此名未知何系

哈達罕公主下嫁扎古喇沁長子伊埒台

傳有  
表無又

有憲宗孫女布呼齊公主下嫁和琳為巴雅爾罕

公主之繼室亦稱昌國大長公主又有紐掄公主

安西王蒙果勒女下嫁和琳從弟索隆噶

表傳皆  
有索隆

噶乃和琳從弟布哈之弟也表中  
止云和琳弟文未明晰今從倚  
又憲宗曾孫女

滿達勒公主亦下嫁和琳子阿實克為伊埒哈雅

之繼室

按泰定帝元年封巴拉實哩之繼母為  
皇妹昌國大長公主今以世次考之憲宗

之曾孫女與泰定為姊妹行故亦稱皇妹非顯宗  
之女也表傳皆有表中但言憲宗孫女且不言所

適

又有魯爾干公主下嫁巴哈弟

巴哈即  
巴圖

蘇都爾

格繼室以羅壘公主又有布延庫哩頁額實公主

下嫁蘇都爾格子布琳濟達又有雅克哈雅公主

下嫁巴拉實哩又有裕羅勒公主

弘簡錄疑為  
明宗之女

下

嫁巴拉實哩子實喇卜多爾濟

以上表皆有傳皆無並未詳何帝女

凡此皆下嫁巴圖之族而表列之昌國公主位者

也趙國大長公主額琳沁

木帝女詳何

下嫁準布哈子

囊嘉特

表有傳無

又有和和公主下嫁準布哈弟奇凌

徹爾

表有傳無布頁赫傳中止有三人曰準布哈阿爾布哈珠爾布哈無所謂奇凌徹爾者

又有晉王女喇特納巴喇公主下嫁奇爾濟蘇子

專

奇爾濟蘇傳有表無

又有阿實克圖魯公主

不詳何帝女

下嫁

阿爾布哈子郇忠襄王摩和納

表有傳無侍中有摩和納襲高唐王事



未云尚主

又有僧格巴拉公主

不詳何帝女

下嫁囊嘉特子

滿濟勒噶

表有傳無

凡此皆阿勒古斯托克塔古哩之

族而表列之趙國公主位者也魯國長公主鄂勒

哲

未詳何帝女

下嫁額埒春

在尚囊嘉特章公主之前表皆有表以額埒春為

旺沁子誤

太祖孫女色徹肯公主下嫁旺沁弟納沁

表有

無傳

又有多爾濟巴勒公主下嫁多阿克巴拉子阿

哩雅實哩至順間封肅雍賢寧公主

表傳皆有

又有博

諾公主下嫁多阿克巴拉弟僧格巴拉至順間封

鄆安大長公主元統元年加號皇姑大長公主表傳

皆有又有博迪蘇公主未詳何帝女下嫁阿禪裔孫滿濟

勒噶表傳皆有又有台呼布延圖公主下嫁阿禪次子

之裔孫綽哈表傳皆有又有鄂克沁公主下嫁和和之

孫布扎爾表傳皆有又有布爾罕公主下嫁托羅海在尚

庫庫楞公主之前表傳皆有凡此皆色辰之族而表列之魯國

公主位者也圖們婁公主下嫁齊呼勒駙馬昂吉拜呼公主下嫁齊呼勒孫輝圖駙馬徹辰公主下

嫁圖弟圖弟疑當作輝圖弟表中脫去輝字阿爾布格駙馬大長公

主僧格巴拉下嫁阿爾布格子岐王托克托穆爾

恐有誤詳成宗姊妹蒙古台公主條下 咱雅巴拉公主下嫁某表缺其名

以上皆從傳採載餘無可徵未詳何帝女凡此皆表列之鄂國公主位

者也太宗孫女布爾罕公主下嫁和爾齊哈喇子

納琳德濟公主薨以其妹巴拜徹爾公主繼之又

薨復以安西王阿南達女烏爾戩公主尚之表有巴爾

珠阿勒坦德又有庫騰太子孫女多爾濟斯滿公  
濟傳亦有

主表作庫騰之女誤下嫁納琳德濟長子特穆爾布哈表傳

皆有按葉盛水東日記曰高昌王世勳碑特穆爾布哈長子布達實哩嗣高昌王尚阿哈額森呼圖克

公主今傳中無有凡此皆巴爾珠阿勒坦德濟之後而表

列之高昌公主位者也世祖孫營王額森特穆爾

女僕國長公主額琳沁巴勒下嫁高麗王王燾主

薨以魏王阿穆爾克女曹國長公主戩通繼之又

顯宗之子梁王松山女缺一字國公主下嫁燾弟曷

凡此皆高麗王妃而表列之高麗公主位者也又

有額蘇掄公主位二人額蘇掄公主下嫁阿陶綽  
斯滿公主下嫁阿陶弟呼圖克特點根公主位三  
人特點根公主下嫁察呼巴延章公主下嫁察呼  
子額森伊埒肯公主下嫁額森子特們德爾多羅  
干公主位二人多羅干公主下嫁巴圖綽斯滿公  
主下嫁巴圖子阿穆爾圖烈公主位三人圖烈公  
主下嫁阿爾斯蘭子額森布哈巴拜公主下嫁額  
森布哈子哈納德勒特克缺一公主下嫁哈納德

勒子拉喀雅爾萬延安公主位六人和拉公主下  
嫁哈達庫庫罕公主下嫁伊木沁世祖孫女托克  
托呼公主下嫁圖們岱爾延安公主下嫁延安王  
額布根又有二公主逸其名一下嫁巴爾默色一  
下嫁薩蘭皆延安公主位更有僅稱某公主不云  
其位何屬者則有世祖孫女英壽大長公主托克

托呼

按弘簡錄云托克托呼元統二年封皇姑英壽大長公主不詳何帝女公主表內世祖孫

女托克托呼適圖們岱爾又載英壽大長公主托克托呼亦稱為世祖孫女

鄂勒哲台

公主下嫁永寧王瑪展更有僅稱公主而逸其名者八人一下嫁達春一下嫁達春子卓奇雅巴一下嫁卓奇雅巴子拜哈刺一下嫁拜哈刺子達巴一下嫁塔布岱一下嫁塔布岱曾孫達織一下嫁達織子哈坦一下嫁哈坦子多歡

以上皆從表採  
載餘無可考

盖合諸王之女而統稱公主人數繁多記載缺畧  
不可得而詳核矣

臣等謹按元史云秦漢以來惟帝姬得號公主而

元則諸王之女亦概稱焉故公主表中以所封國號為綱前後各公主封號同者皆從類叙王圻續通考所載全與表同第考各朝公主皆以某帝為綱分代登載不應於元代而獨異其體且公主之稱終當以帝之姑姊妹女子子而得至諸王之女系屬畧踈者豈宜概稱故仍循各代例以諸帝之親屬為綱其系踈與未詳為何帝女者別為類叙於後元史於公主有表無傳惟錯見於帝紀及諸



人列傳中弘簡錄彙為一卷今據之而仍取史文  
校叅其互有疑誤者則稍為訂正云

明太祖姊妹

太原長公主下嫁王七一早卒七一贈駙馬都尉曹  
國長公主下嫁李貞早卒貞封曹國公

臣等謹按二公主皆太祖即位後追冊為公主者  
王圻續通考云皆太祖姊妹也

明史公主列傳曰明制皇姑曰大長公主皇姊妹

曰長公主皇女曰公主皆受金冊祿二千石壻曰  
駙馬都尉親王女曰郡主郡王女曰縣主孫女曰  
郡君曾孫女曰縣君元孫女曰鄉君壻皆儀賓郡  
主祿八百石餘遞減有差

太祖十六女

長臨安公主洪武九年下嫁韓國公李善長子祺永  
樂十九年薨

按王圻續通考曰善長賜  
死後公主尋薨與史異

寧國公主孝

慈皇后生洪武十一年下嫁汝南侯梅思祖從子殷

永樂時進封長公主宣德時薨

按王圻續通考主後稱大長公主與春明

步餘錄同當不誤但云二十三年永樂無二十三年王本誤矣

崇寧公主洪武十

七年下嫁牛城未幾薨

王圻續通考作第三女未詳

安慶公主寧

國公主同母妹洪武十四年下嫁歐陽倫汝寧公主

洪武十五年下嫁吉安侯陸仲亨子賢

史作陸賈王圻續通考作

陸賢春明夢餘錄亦作賢故從之

懷慶公主成穆孫貴妃生洪武十

五年下嫁永春侯王寧大名公主洪武十五年下嫁

灤城侯李堅宣德元年薨福清公主鄭安妃生洪武

十八年下嫁鳳翔侯張龍子麟永樂十五年薨壽春

公主洪武十九年下嫁潁國公傅友德子忠二十一

年薨十公主早薨

王圻續通考亦未詳

南康公主二十一年下

嫁東川侯胡海子觀正統三年薨

王圻續通考云主於正統十一年薨

與史異

永嘉公主郭惠妃生洪武二十二年下嫁武定

侯郭英子鎮景泰六年薨世宗時追諡貞懿十三公

主早薨含山公主高麗妃韓氏生洪武二十七年下

嫁尹清天順六年薨

王圻續通考十三公主十四公主皆未詳十四公主即今所書

含山公

汝陽公主永嘉公主同母妹洪武二十七年

下嫁謝達仁宗即位進稱大長公主寶慶公主太祖

最幼女永樂時下嫁趙輝

春明夢餘  
錄作輝

宣德八年薨

史載

趙輝成化十二年卒與王圻續通考同王圻續通考云公主於正統中薨與史異

傳曰洪武九年二月定制公主未受封者歲給紵

絲紗絹布線

紵絲紗羅各一十疋絹夏布棉布各三十疋綿二百兩見史料

已封

賜莊田一區歲徵租一千五百石鈔二千貫春壽

公主為太祖所愛賜吳江縣田一百二十餘頃皆

上腴歲入八千石踰他主數倍及薨賜明器儀仗以葬

又曰仁宗即位汝陽公主以屬尊與寧國懷慶大名南康永嘉含山寶慶七主皆進稱大長公主自後諸帝即位進加長公主大長公主皆如制

福成公主南昌王女慶陽公主蒙城王女皆太祖姪女洪武元年冊為公主福成主下嫁王克恭慶陽主

下嫁黃琛

慶陽公主王本云永樂二年薨

傳曰福成慶陽皆成祖從姊或謂太祖從姊者誤

惠帝姊妹

興宗女

江都公主洪武二十七年下嫁長興侯耿炳文子璿  
洪武時稱江都郡主建文元年進公主永樂初復降  
為郡主以憂卒宜倫郡主永樂十五年下嫁于禮第  
三公主無考南平郡永樂十五年薨未下嫁

臣等謹按史言興宗四女第三女無考王圻續通

考止云二女江都公主為長女第二女未詳其缺

畧多矣

成祖五年

永安公主下嫁廣平侯表容永樂十五年薨

按傳云永樂十

五年主薨停容候祿宣宗即位復故卒王圻續通考云主以宣德元年薨容以宣德四年卒與史異永

平公主下嫁富陽侯李讓正統九年薨

王圻續通考云宣德初封

長公主正統初加大長公主

安成公主文皇后生下嫁西寧侯宋

晟子琥正統八年薨

按王圻續通考云正統元年進加大長公主八年薨與史合惟

以為下嫁宋瑛則誤矣

咸寧公主安成主同母妹永樂九年下



嫁宋琬弟西寧侯瑛正統元年薨常寧公主下嫁西平侯沐英子昕正統六年薨

臣等謹按史載成祖五女王圻續通考作七女永安永平二主所載同其安成公主云為成祖第三女洪武三十五年下嫁宋瑛又以仁宗女清河公主真定公主皆云成祖女清河公主永樂四年下嫁駙馬李銘真定公主下嫁駙馬王誼正統十年薨餘二公主無考據今明史考之王圻續通考之

訛甚矣

仁宗七女

嘉興公主昭皇后生宣德三年下嫁井源正統四年

薨慶都公主宣德三年下嫁焦敬正統五年薨清河

公主宣德四年下嫁李銘八年薨

王圻續通考  
誤作成宗女

真定

公主李賢妃生宣德四年下嫁王誼景泰元年薨

王圻

續通考誤  
作成宗女 德安公主早殤延平公主德慶公主俱未

下嫁薨

臣等謹按仁宗之女王圻續通考全闕

宣宗二女

順德公主正統元年下嫁石璟

按順德主傳云璟於成化十四年奉祀南

京踰年卒但書駙馬之卒年王圻續通考主以八年薨璟以成化十五年卒參訂相合

常德公

主章皇后生正統五年下嫁薛桓成化六年薨

王圻續通

考云主於正統十二年下嫁後進大長公主

英宗八女

重慶公主與憲宗同母天順五年下嫁周景弘治十

卷之二十三

二年薨

按重慶王圻續通考作惠慶史傳云景以弘治八年卒主又後四年而薨王圻續通考作

主以弘治元年薨景以八年卒亦異景王圻續通考作璟

嘉善公主王惠妃生成

化二年下嫁兵部尚書王驥孫增弘治十二年薨淳

安公主成化二年下嫁蔡震

史於淳安主薨年未詳王圻續通考云弘治十

二年薨今考王圻續通考所載駙馬蔡震之卒年贈官賜謚皆與史合則主之薨年當亦不誤

崇德

公主楊安妃生成化二年下嫁興濟伯楊善孫偉弘

治二年薨

王圻續通考云主後進大長公主

廣德公主萬宸妃生成

化八年下嫁樊凱二十年薨宜興公主魏德妃生成

化九年下嫁馬誠正德九年薨隆慶公主高淑妃生

下嫁游泰十五年薨嘉祥公主劉妃生成化十三年

下嫁黃鏞十九年薨

王驥孫增王驥傳作其孫添史料亦作添楊善孫偉楊善傳作

其孫增史料亦作增疑公主傳內有誤

臣等謹按王圻續通考崇德廣德宜興嘉慶嘉祥皆稱長公主據史傳遞列之數宜興爲第六主隆慶第七主王圻則以隆慶爲六宜興爲七

景帝一女

固安公主英宗復辟降郡主成化五年年已長以閩  
臣奏下嫁王憲

臣等謹按王圻續通考云成化二年下嫁弘治四  
年主薨

憲宗五女

仁和公主弘治二年下嫁齊世美

王圻續通考  
作齊世英

嘉靖

二十三年薨永康公主弘治六年下嫁京山侯崔元

王圻續通考主累進大  
長公主嘉靖十一年薨德清公主弘治九年下嫁林

岳林岳卒於正德十三年主孀居三十一年始薨長  
泰公主成化二十三年薨仙遊公主弘治五年薨

臣等謹按史傳憲宗止五女王圻云六女長仁和  
次永康次德清皆稱長公主第四女無考五為長  
泰六為仙遊

### 孝宗三女

太康公主早薨永福公主嘉靖二年下嫁鄔景和

王圻

續通考云嘉  
靖四年主薨

永淳公主下嫁謝詔

王圻續通考云嘉  
靖元年下嫁未幾

主  
薨

臣等謹按王圻續通考孝宗女全闕而云睿宗有四女長寧為長善化為二皆早薨又以孝宗女永福為三永安為四永安即下嫁謝詔之永淳主也取以相証大不符矣

世宗姊妹

睿宗女

長宜公主善化公主皆早薨

世宗五女



常惠公主思柔公主皆早薨寧安公主嘉靖三十四年下嫁李和歸善公主早薨嘉善公主嘉靖三十六年下嫁許從誠四十三年薨

臣等謹按王圻續通考載世宗二女以寧安為成平云是長女以嘉善為安泰云是第二女且云安泰於隆慶五年薨與史云四十三年薨亦異

穆宗六女

蓬萊公主太和公主皆早薨壽陽公主萬曆九年下

嫁侯拱辰永寧公主下嫁梁邦端萬曆三十五年薨

按史未詳下嫁之年而但書主於三十五年薨王圻續通考稱長公主而缺永寧封號云萬曆十年下嫁

梁駙馬三下缺月餘卒以史文參考當是駙馬早卒也瑞安公主神宗同母妹萬

曆十三年下嫁萬煒王圻續通考作十五年崇禎時加大長公

主十七年煒與其庶子長祚弘祚皆殉難延慶公主

萬曆十五年下嫁王曷王圻續通考作十六年

臣等謹按王圻續通考於蓬萊太和二公主外皆

缺封號其皆稱長公主者在神宗朝固宜然也第

作穆宗七女而以史所載神宗之女王下嫁楊春元者亦作穆宗女并稱長公主當有誤

神宗十女

榮昌公主萬曆二十四年下嫁楊春元壽寧公主萬曆二十七年下嫁冉興讓崇禎十七年興讓死於賊靜樂雲和雲夢靈邱仙居泰順香山天台八公主皆早薨

光宗九女

懷淑公主七歲而薨餘五公主皆早薨寧德公主下嫁劉有福遂平公主天啟七年下嫁齊贊元樂安公主下嫁鞏永固

傳曰當賊陷都城時樂安公主已薨未葬永固以黃繩縛子女五人繫柩旁曰此帝甥也不可污賊手舉劍自刎闔室自焚死

臣等謹按春明夢餘錄云崇禎初追封皇姊悼淑公主至辛巳年五月御札追封慎嬪所生皇十妹

為悼溫公主是年七月又定十妹名薇姪九妹名  
薇韶明史中皆不載

熹宗二女

皆早世

愍帝六女

坤儀公主周皇后生早薨長平公主年十六選周顯  
尚主未婚都城陷帝揮劍斫斷主左臂又斫昭仁公主  
越五日長平主復甦

大清順治二年上書願歸空門

詔不許命顯復尚故主踰年病卒

賜葬餘三公主早世無考

臣等謹按春明夢餘錄載崇禎時皇女樂安長公主名徽媛樂安既為長公主徽媛之名亦與徽媛徽妯相類則當即光宗女而下嫁鞏永固者也乃稱為皇女且與愍帝子慈炯慈照同列誤矣

欽定續文獻通考卷二百三